

Naalakkersuisumik toqqaanissaq
(Naalakkersuisut Siulittaasuat)

Saqqummiussissutissaq
(Naalakkersuisut Siulittaasuat)

Naalakkersuisuni ilaasortat katitigaanerisa allangortinneqarnissaanik inassuteqaatima ullumi Inatsisartut ataatsimiinneranni ullormut oqaluuserisassani ilanngullugu saqqummiunneqarsinnaanissaanut periarfissinneqarama Inatsisartut Siulittaasoqarfiat qutsavigissavara.

Aalisarnermut, Piniarnermut Nunalerinermullu Naalakkersuisoq Karl-Kristian Kruse, Siumut, aalisarnermik inuussutissarsiumminut uteqqissinnaajumalluni Naalakkersuisuni ilaasortatut tunuarniuteqarpoq. Taamatut kissaateqarneq Naalakkersuisut siulittaasuattut ataqqivara Karl-Kristian Krusellu kissaataa tusaatissatut tigullugu. Periarfissaq iluatsillugu Karl-Kristian Kruse Aalisarnermut, Piniarnermut Nunalerinermullu Naalakkersuisutut sulillaarsimaneranik aammalu Naalakkersuisuni suleqatigillaarsimaneranik qujassuteqarfissavara.

Karl-Kristian Krusep Naalakkersuisuni ilaasortatut tunuarniuteqarnerata kingunerisaanik Aalisarnermut, Piniarnermut Nunalerinermullu Naalakkersuisussamik nutaamik toqqaanissamut inassuteqarnissara aalajangersimavara. Matumuunalu Inatsisartuni ilaasortaq Nikolaj Jerimiassen, Siumut, Aalisarnermut, Piniarnermut Nunalerinermullu Naalakkersuisussatut toqqarneqarnissaa inassutigaaara.

Massakkut Naalakkersuisuni ilaasortaasut akornanni suliassaqarfiit akisussaaffigineqartut allangortitilaarnisaannut periarfissaq atorussuppara. Inatsisinik Atuutsitsinermit suliassaqarfik massakkut Pinnortitamut, Avatangiisinut Inatsisinillu Atuutsitsinermit Naalakkersuisumit akisussaaffigineqartoq Ilaqutariinnermut, Naligiissitaanermut Isumaginninnermullu Naalakkersuisoqarfimmut nuunneqassaaq. Nunani tamalaani uummassusillit assigiinngisitaartuunerat pillugu suliassaqarfik Inuussutissarsiornermut, Suliffeqarnermut, Niuernermut, Nunanullu Allanut Naalakkersuisoqarfimmit Pinnortitamut, Avatangiisinut Inatsisinillu Atuutsitsinermit Naalakkersuisoqarfimmut nuunneqassaaq. Suliassaqarfiit agguataarneri allangortinneqarput suliassaqarfiit Naalakkersuisoqarfinit saqqummiussami pineqartunit isumagineqalernissaat pitsaanerpaassasoq isumaqarama.

Tamatuma kingunerisaanik Inatsisartut Naalakkersuisullu pillugit Inatsisartut inatsisaat nr. 26, 18. november 2010-imeersumi § 22 imm. 3 naapertorlugu Naalakkersuisuni ilaasortat imatut katitigaalernissaat Inatsisartunit taasissutigisassanngortippara:

1. Randi Vestergaard Evaldsen, Demokraatit, Aningaasaqarnermut Aatsitassanullu Naalakkersuisutut ingerlaannassasoq.
2. Knud Kristiansen, Atassut, Ineqarnermut, Sanaartornermut Attaveqaqatigiinnermullu Naalakkersuisutut ingerlaannassasoq.
3. Nikolaj Jerimiassen, Siumut, Aalisarnermut, Piniarnermut Nunalerinermullu Naalakkersuisunngussasoq
4. Vittus Qujaukitsoq, Siumut, Inuussutissarsiornermut, Suliffeqarnermut, Niuernermut Nunanullu Allanut Naalakkersuisutut ingerlaannassasoq.

5. Martha Lund Olsen, Siumut, Ilaqutariinnermut, Naligiissitaanermut, Isumaginninnermut Inatsisinillu Atuutsitsinnermut Naalakkersuisunngussasoq.
6. Doris Jakobsen, Siumut, Peqqinnissamut Naalakkersuisutut ingerlaannassasoq.
7. Nivi Olsen, Demokraatit, Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisutut ingerlaannassasoq.
8. Mala Høy Kúko, Atassut, Pinngortitamut Avatangiisinullu Naalakkersuisunngussasoq.